

摘藻堂四庫全書薈要

史部

欽定四庫全書薈要卷八千八百七十九

明史紀事本末卷六十七

浙江提學僉事谷應泰編

爭國本

神宗萬曆十年八月丙申皇元子生頒詔赦天下

十四年正月皇第三子生進其母鄭氏為貴妃 二月

輔臣申時行等請冊立東宮疏曰早建太子所以尊宗廟重社稷也自元子誕生五年于茲矣即今麟趾螽斯

方興未艾正名定分宜在于茲祖宗朝立皇太子英宗以二歲孝宗以六歲武宗以一歲成憲具在惟陛下以今春月吉旦勅下禮部早建儲位以慰億兆人之望上曰元子嬰弱少俟二三年舉行戶科給事中姜應麟吏部員外沈璟上言貴妃雖賢所生為次子而恭妃誕育元子主鬯承祧顧反令居下耶乞收回成命首進恭妃次及貴妃上怒謫應麟廣昌典史璟亦調外上諭閣臣曰降處非為冊封惡彼疑朕廢長立幼先揣摩上意

耳我朝立儲自有成憲朕豈敢以私意壞公論耶刑部
主事孫如法上言恭妃誕育元嗣五年未聞有進封之
典貴妃鄭氏一生子即有皇貴妃之封貴妃能得之於
皇子初生之日而恭妃不能得之五年敬奉之久此天
下不能無疑也上怒謫潮陽典史御史孫維城楊紹程
請定儲位俱奪俸 禮部侍郎沈鯉奏宜並封恭妃王
氏上諭待元子冊立行 皇貴妃鄭氏父鄭承憲為其
父請卹典援中宮永年伯王禕例禮部疏駁上命予墳

價五百兩

十五年春正月禮科都給事王三餘御史何倬鍾化民王慎德各奏建儲不報輔臣請建儲封王令候旨行

十六年六月山西道御史陳登雲請冊立東宮且罪鄭承憲驕橫之狀不報

十八年春正月朔上御毓德宮召輔臣申時行許國王錫爵王家屏於西室以冊立東宮係宗社計請上曰朕知之朕無嫡子長幼自有定序鄭妃亦再三陳請恐外

間有疑但長子猶弱欲俟其壯大使出輔臣復請曰皇
長子年已九齡蒙養豫教正在今日上頷之時行等出
上遽令司禮監追止之云已令人宣皇子來與先生一
見輔臣還至宮門內有頃皇長子皇三子俱至引至御
榻前皇長子在御榻右上手携之向明正立輔臣等注
視良久因奏曰皇長子龍姿鳳表岐嶷非凡仰見皇上
昌後之仁上欣然曰此祖宗德澤聖母恩庇朕何敢當
輔臣奏皇長子春秋長宜讀書且云皇上正位東宮時

方六齡即已讀書皇長子讀書已晚矣上曰朕五歲即能讀書復指皇三子云是兒亦五歲尚不能離乳母遂手引皇長子至膝前撫摩歎息輔臣叩頭奏曰有此美玉何不早加琢磨使之成器上曰朕知之時行等叩頭出十月吏部尚書宋纁禮部尚書于慎行率羣臣合疏請冊立東宮上怒下旨奪俸輔臣申時行引疾乞休王家屏居中調之上意稍解以鄭國泰請冊立疏示羣臣傳諭建儲之禮當於明年傳立廷臣無復奏擾如有

復請直踰十五歲

十九年冬十月閣部大臣合疏請建東宮先是建儲事既奉上旨申時行與同官約遵守稍需一歲每諸司接見亦以此告之故辛卯歲自春及秋曾無言及者至是工部主事張有德請備東宮儀仗時行方在告次輔許國乃曰小臣尚以建儲請吾輩不一言可乎倉卒具疏首列時行名以上時行聞之大愕別具揭云臣已在告同官疏列臣名臣不知也故事閣臣密揭皆留中而是

疏與諸疏同發禮科羅大紘遂上疏論時行迎合上意以固位武英中書黃正賓繼之上怒杖正賓削大紘籍十二月輔臣王家屏乞明春建儲以塞道路揣摩之口銷牆幃牽制之私不報

二十年春正月禮科都給事李獻可疏請豫教削籍大學士王家屏具揭申救封還御批上怒給事鍾羽正舒弘緒陳尚象李固策丁懋遜吳之佳楊其休葉初春御史錢一本鄒德泳賈名儒陳禹謨主事董嗣成交章申

救削籍降調有差科臣孟養浩疏最後上加杖一百家
屏三疏乞歸許之吏部主事顧憲成章嘉禎等廷推家
屏忠愛不宜廢置請召還上怒憲成削籍嘉禎謫羅定
州州判十一月禮部尚書李長春屢請冊立疏十有
四不報尋罷去

二十一年春正月輔臣王錫爵歸省還朝密疏請建東
宮曰前者冊典垂行而輒為小臣激聒所阻皇上親發
大信定以二十一年舉行於是羣囂寂然蓋皆知成命

在上有所恃而無虞也倘春令過期外廷之臣必曰昔以激聒而改遲今復何名而又緩伏乞降諭舉行使盛美皆歸之獨斷而天功無與於人謀上報云朕雖有今春冊立之旨昨讀皇明祖訓立嫡不立庶皇后年尚少倘復有出是二儲也今將三皇子並封王數年後皇后無出再行冊立錫爵復疏曰昔漢明帝取宮人賈氏子命馬皇后養之唐玄宗取楊良媛子命王皇后養之宋真宗劉皇后取李宸妃之子為子與其曠日遲久待將

來未定之天孰若酌古準今成目下兩全之美臣謹遵
諭並擬傳帖二道以憑採擇然尚望皇上三思臣言俯
從後議以全恩義服人心上竟用前諭工部郎中岳元
聲謂科臣張貞觀史孟麟曰此舉何如貞觀曰此乃錫
爵密進者元聲復詣禮部郎中陳大來家兵科給事許
弘綱禮部郎中于孔兼皆在弘綱以屬元聲元聲曰我
方論錫爵若言謂有成心反敗乃事其以元聲為後勁
可也弘綱不允元聲遂歸草疏適禮部郎中顧允成張

納陛至遂聯名上大約言皇上正位東宮之日仁聖亦
青年莊皇帝不設為未然事以誤大計疏入刑科王如
堅光祿丞朱維京疏繼上曰皇上念及中宮良厚顧中
宮春秋方盛前星一耀則所冊元子自當避位何嫌何
疑今以將來未期之事格見在已成之命恐中宮聞之
亦有不安者皇上以手札咨之錫爵錫爵不能如李泌
之委曲叩請如旨擬勅難以厭中外之人心光祿少卿
徐傑署丞王學曾郎中陳泰來于孔兼疏繼上上怒如

堅維京謫成傑學曾等為民而元聲允成納陞得寬旨
然並封旨竟如故元聲與允成納陞泰來孔兼暨李啟
美曾鳳儀鍾化民項德禎面詰錫爵於朝房錫爵色甚
厲元聲曰閣下奈何誤引親王入繼之文為儲宮待嫡
之例鳳儀語稍遜元聲厲聲呵之曰曾員外不知祖訓
錫爵容霽衆欲出元聲曰大事未定奈何出錫爵曰然
則如何元聲曰當以廷臣相迫告之皇上錫爵曰書諸
公之名以進何如元聲曰請即以元聲為首杖戍惟命

錫爵唯唯庶吉士李騰芳上書錫爵曰聖明在上議者俱為杞憂以公苦心疑為集菴此皆妄也但聞古賢豪將與立權謀之事必度其身能作之身能收之則不難晦其迹於一時而終可皎然於天下公欲暫承上意巧借王封轉作冊立然以公之明試度事機急則旦夕緩則一二年竟公在朝之日可以遂公之志否恐王封既定大典愈遲他日繼公之後者精誠智力稍不如公容或壞公事隳公功而罪公為尸謀公何辭以解此不獨

宗社之憂亦公子孫之禍也錫爵讀訖爽然曰諸公詈我我無以自明如子言我受教但我每揭皆手書筆跡甚明也騰芳曰揭帖手書人何由知異日能使天子出公手書傳示天下乎錫爵默然良久復曰古人留侯鄴侯皆以權勝騰芳曰鄴侯不欲以建寧為元帥而咏摘瓜詩以衛廣平此經也非權也但與肅宗私議家事恐上皇不安而遲廣平為太子別是一則然建寧之死胎此矣若子房以強諫為無益而招致四皓有似行權然

未嘗請太子與趙王並封且行權必大智人委曲宛轉或立語而移或默然而定若需之數年更以他手雖聖人不能保矣語次錫爵不覺泣下翌日上疏自劾三誤不允 二月輔臣王錫爵復疏冊立上命三皇子俱停封錫爵復疏爭之畧曰皇上旋止封王之命再訂二三年冊立之期真古聖王從善轉圜之盛德顧臣私憂過計去年之命既改於今年則焉知今年之命不改於他日夫人情惟無疑則已疑心一生則將究及宮闈之隱

情慮及千萬世之流禍復曰皇長子年近加冠未就外
傳從來所未聞皇上縱欲少緩冊立之期豈可不先行
豫教之禮上不允尋降陳泰來薛敷教于孔兼顧允成
於外削禮科張貞觀籍為民 八月王錫爵以星變言
天以皇上為子皇上以太子為子天子之象帝星太子
之象前星方今禳雩第一議莫如冊立上慰答之 十
一月上御煖閣召輔臣王錫爵錫爵叩頭力請建儲上
允明年出閣聽講尋又傳諭皇長子皇三子齡歲相等

欲一併行出閣禮錫爵復奏皇上有子而均愛之均教之固慈父一體之念然自外廷而觀皇長子明年十三歲皇三子明年九歲大抵皇子生十歲而入學以皇長子之太遲形皇三子之太早先後緩急之間一不慎而聖心又晦矣 十二月輔臣王錫爵等請皇長子先行冠禮上報云東宮與王袞冕皮弁二服冠則皆同其服則異今冠禮將何從宜暫着常服出講

二十二年二月皇長子出閣講學禮部侍郎馮琦進儀

注上以未冊立免侍衛儀仗

二十六年五月吏科給事戴士衡全椒知縣樊玉衡削籍謫戍先是庚寅山西按察使呂坤輯閏範圖誌鄭國泰重刻之增刊后妃首漢明德皇后終鄭貴妃科臣戴士衡指其書上言謂呂坤逢迎掖庭菀枯之形已分語侵貴妃樊玉衡前疏皇長子冊立中亦有皇上不慈皇長子不孝皇貴妃不智等語貴妃聞之泣訴于上會有援引歷代嫡庶廢立之事著為一書內刺張養蒙劉道

亨魏允貞鄭承恩鄧光祚洪其道程紹白所知薛亨呂
坤等名曰憂危竑議者戚黨疑其書出士衡手張位教
之鄭承恩遂上疏力辯并奏士衡假造偽書中傷善類
目為二衡以激聖怒欲併殺張位上怒甚二臣謫戍

六月御史趙之翰以憂危竑議為戴士衡偽造主於張
位預謀者徐作劉楚先劉應秋楊廷蘭萬建崑也中旨
禮部右侍郎劉楚先都察院右都御史徐作罷國子祭
酒劉應秋降調吏科左給事楊廷蘭禮部主事萬建崑

俱謫典史張位先以密薦楊鎬東征失利罷去命值赦
不宥

二十八年春正月禮部尚書余繼登請先皇長子冊立
而後冠禮可致祝婚禮可致醮大學士沈一貫請皇長
子冠婚不報三月南京禮部侍郎葉向高等乞行皇
長子三禮不報已巳移皇長子慈慶宮再諭內閣冊立
有期羣臣不得瀆擾夏四月刑部主事謝廷讚請冊
立謫貴州布政司照磨戊寅沈一貫密揭請撰勅上報

曰謝廷讚狂妄少待之俾天下臣民曉然知出自朕心

秋七月癸卯諭皇長子清弱大禮稍俟之百官毋沽

名煩聒 冬十月乙酉諭內閣來春冊儲庚子工科都

給事王德完言臣入京數月道路相傳中宮役使止數

人憂鬱致疾貼危不保臣竊謂不然第臣得風聞言事

若如所傳則宗社隱憂臣羨袁盎却坐之事祈皇上眷

顧中宮止輦虛受臣死且不朽上震怒下錦衣衛獄訊

其由吏部尚書李戴御史周盤等論救俱切責之 十

一月戚臣鄭國泰疏請皇子先冠婚後冊立科臣王士昌糾之署禮部朱國祚以國泰顛倒其詞與明旨有背恐釀無窮之禍不報皇長子出閣講學時嚴寒皇長子噤甚講官郭正域大言天寒如此殿下當珍重喝班役取火禦寒時中官圍爐密室聞正域言出之上聞亦不罪

二十九年五月丙午戚臣鄭國泰請冊儲冠婚奪俸戊申禮科右給事楊天民王士昌等請立儲俱謫貴州典

史御史周盤等疏救奪俸 八月甲午沈一貫上言詩
既醉之篇臣祝其君曰君子萬年介爾景福繼曰君子
萬年永錫祚胤則願其子孫之多又曰釐爾女士從以
孫子願酬淑媛而生賢子孫也斯干之篇曰築室百堵
西南其戶爰居爰處爰笑爰語美新宮也繼曰吉夢維
何維熊維羆男子之祥言吉祥善事當生聖子神孫無
窮也今稱觴萬壽兩宮落成在建同祝而啟天之祥實
自聖心始皇上大婚及時故得聖子早今皇長子大禮

必備其儀推念真情不如早諧伉儷之為適皇上孝奉
聖母朝夕起居不如早遂含飴弄曾孫之為樂乞今年
先皇長子大禮明春後遞舉諸皇子禮子復生子孫復
生孫坐見本支之盛享令名集完福矣上心動諭俟即
日行之 冬十月乙亥上以典禮未備欲改期冊立沈
一貫封還聖諭力言不可十五日己卯冊立皇長子為
皇太子暨冊封福王瑞王惠王桂王詔告天下上特諭
在籍輔臣申時行王錫爵知之壬辰皇太子加冠福瑞

諸王俱冠

三十年春正月丁巳增東宮官屬己未福王暫講武英殿西廡二月丙子冊皇太子妃郭氏上引疾免質

三十一年十一月丁卯有蜚語曰續憂危竝議凡三百餘言謂東宮不得已立之而從官不備寓後日改易之意其特用朱賡賡者更也內外官附賡者文則戎政尚書王世揚巡撫孫瑋總督李汶御史張養志武則錦衣都督王之禎都督僉事陳汝忠錦衣千戶王名世王承

恩錦衣指揮僉事鄭國賢又有陳矩朝夕帝前以為之
主沈一貫右鄭左王規福避禍他日必有靖難勤王之
事吏科都給事中項應祥撰四川道監察御史喬應甲
刊其書一夕間自宮門迄於衢巷皆遍厥明舉朝失色
莫敢言大學士朱賡得於私宅以聞請緝其人乞歸不
允上大怒令廠衛搜緝務得造書主名責項應祥喬應
甲回奏沈一貫請嚴跡之偵校塞路購賞格五千金官
指揮僉事或曰妖書似出清流之口將以傾沈一貫者

或曰此奸人作之以陷郭正域正域時有清流領袖之目見忌一貫已喬應甲項應祥各回奏奸書謗人無自名理不問召皇太子慰安之太子泣上亦泣隨令內豎以慰安太子語諭內閣時一貫方以楚宗事恨郭正域正域輔臣沈鯉門生也鯉素蹢蹢尤負望供天啟聖聰牌於閣入則禮之時開告密鯉語人曰此事何必張皇也一貫大不懌正域放歸待凍路河之楊村聞問不絕一貫益側目十二月壬午給事錢夢臯直指正域併及沈鯉

御史康丕揚佐之初僞醫吳江沈令譽多貴遊丕揚巡城跡捕之搜得楚王揭華越副封及刑部主事于玉立所致吏部郎中王士騏書以玉立起官士騏與正域左右之又前漢中府同知荆門胡化首渠縣訓導阮明卿撰妖書廉問無據而明卿為夢臯姻故夢臯首攻正域疏中稱沈令譽郭氏之食客胡化同鄉之年友當亟訊奸黨治正域罪次輔沈鯉屢為奸人緩頰舉朝曰大變彼曰小事舉朝曰當捕彼曰可容所上揭有震動人心

虧損聖德等語回互隱伏意欲何為疏入中外大駭于是發卒圍正域舟捕其僕隸乳媪十三人巡捕都督陳汝忠又獲正域舍人毛尚文江夏布衣王忠巡城御史康丕揚捕僧達觀琴士鍾澄百戶劉相等同沈令譽下詔獄考訊無所得邏校且環逼鯉邸迫脅不堪皇太子遣閹人語閣臣曰先生輩容我乞全郭侍郎會都察院溫純上書訟之唐文獻陶望齡先後詣沈一貫為解陳矩亦力持之鯉得安王士騏于玉立以詞連落職錦衣

都督王之禎千戶王名世等首錦衣都督周嘉慶下東
廠會鞠闔門慘掠嘉慶亦不承吏部尚書李戴為嘉慶
外父拷掠時不忍慘視起入中堂上聞而惡之罷戴歸
命錦衣嚴鞠妖書沈一貫朱賡請寬疑獄沈鯉亦上章
引咎且乞歸不聽最後錦衣百戶崔德緝順天黥生
生光并其子其篇婦趙氏陳氏鞠之生光性險賊善脅
人金坐譴成大同赦歸終不悛猶脅鄭國泰家方廷訊
時不揚等皆欲坐郭正域御史牛應元指天為誓沈裕

厲聲折生光從重論恐株連多人無所歸獄生光自誣服歎曰朝廷得我結案如一移口諸君何處求生活乎刑部尚書蕭大亨必欲窮究之禮部侍郎李廷機趙世卿告輔臣賡謂即此可以具獄賡以語一貫事得稍解三十二年夏四月乙酉提督東廠司禮太監陳矩上妖書獄移皦生光刑部論斬上欲加等以謀危社稷律論磔矩素清直妖書事保全善類為多壬寅皦生光磔于市妻子戍邊妖書非生光也第其人可死故人不甚憐

之或謂妖書出武英殿中書舍人永嘉趙士禎後士禎疾篤自言之肉碎落如磔

三十九年九月己酉皇貴妃王氏薨妃雖生皇太子失寵目眚比疾篤太子始知之亟至宮門尚閉挾鑰而入妃手太子衣而泣曰兒長大如此我死何憾太子慟左右皆泣莫能仰視須臾薨

四十年冬十月閣臣葉向高請福王之國報明年春舉行

四十一年春正月禮部請東宮開講福王就國不報四月兵部尚書王象乾復請之上曰親王之國祖制在春今踰期矣其明年春舉行五月辛未葉向高言福王之國奉旨明春舉行頃復以莊田四萬頃責撫按如田頃足而後行則之國何日聖諭明春舉行亦寧可必哉福王奏稱祖制謂祖訓有之乎會典有之乎累朝之功令有之乎王所引祖制抑何指也如援景府則自景府而前莊田並未出數千頃外獨景府踰制皇祖一時失聽

至今追咎王奈何尤而效之自古開國承家必循理安

分為可久鄭莊愛太叔段為請大邑漢竇后愛梁孝王
封以大國皆及身而敗臣不勝忠愛之念不得不明言
之六月己丑錦衣衛百戶王日乾訐奏奸人孔學與
皇貴妃宮中內侍姜龐劉諸人請妖人王子詔詛呪皇
太子刊木像聖母皇上釘其目又約趙思聖在東宮侍
衛帶刀行刺語多涉鄭貴妃福王葉向高語通政使具
叅疏與日乾奏同上之向高密揭日乾孔學皆京師無

賴壽張至此此大類往年妖書但妖書匿名難詰今兩造俱在法司其情立見皇上第靜俟勿為所動動則滋擾上初覽日乾疏震怒及見揭意解遂不問東宮遣取閣揭向高曰皇上既不問則殿下亦無庸更覽皇太子深然之尋御史以他事叅日乾下之獄踰年而挺擊之

獄興

詳三案

四十二年三月丙子福王常洵之國

四十三年二月南京御史汪有功言福府內侍李進忠

擅祭告孝陵不報 秋七月太常寺少卿史孟麟請冊立皇太孫謫兩淮鹽運判官

四十四年八月壬寅皇太子出閣講學蓋曠期十二年四十八年夏四月皇后王氏崩后賢而多病國本之論起上堅操立嫡不立長之語羣疑上意在后病不可知貴妃即可為國母舉朝皇皇及上年高后以賢見重而東宮益安至是崩中宮虛位數月貴妃竟不進位上不豫右諭德張鼎上言皇上起居靜攝皇太子執禮之

暇時親左右皇長孫少成之器娛樂庭除既足寬懷亦稱聚順臣竊見士民之家或慈母見背嚴父孤單惟兒孫繞膝可開眉宇雖天子不同民間而骨肉應無二理七月時上寢疾久皇太子希得召見御史左光斗等詣方從哲請候安從哲曰上諱疾即入門左右不敢傳兵科給事中楊漣曰昔宋文潞公問仁宗疾內侍不肯言潞公曰天子起居汝曹不令宰相知將無他志下中書省行法今誠日三問不必見亦不必上知第令內臣知

大臣在門且公當宿閣中從哲曰非故事曰潞公不訶
史志聰乎此何時尚問故事二十一日丙申上疾大漸
召輔臣方從哲等入弘德殿尋出日已旰皇太子尚傍
徨寢門外不得入漣光斗遣人語東宮內侍王安曰上
疾甚不召太子非上意太子當力請入侍以備非常即
夜毋輕出安故守正力擁佑太子即日上崩遺命封貴
妃鄭氏為皇后

泰昌元年即萬曆四十八年也八月光宗既踐祚遵遺

命封皇貴妃命禮部查例行尚書孫如游爭之曰祖宗朝其以配而后者乃敵體之經其以妃而后者則從子之義故累朝非無抱衾之愛終引割席之嫌者則以例所不載也皇貴妃事先帝有年不聞倡議于生前而顧遺詔於逝後豈先帝彌留之際遂不及致詳耶且王貴妃誕育殿下豈非先帝所留意者乃恩典尚爾有待而欲令不屬毛離裏者得母其子恐九原亦不無怨恫也鄭貴妃賢而習于禮處以非分必非其心之所樂書之

史冊傳之後禩將為盛代典禮之累且昭先帝之失言

非所以為孝也中庸稱達孝為善繼善述義可行則以
遵命為孝義不可行則以遵禮為孝臣不敢奉命從之

谷應泰曰光宗本恭妃所產神皇之元子也恭妃
無寵擅寵者鄭貴妃耳乃自萬曆十四年輔臣申
時行以建儲為請至二十九年而儲位始定自古
父子之間未有受命若斯之難也語云貴夫人愛
孺子又云母愛者子抱其時枯菀之勢既形金珙


之寒斯劇羽翼孝惠者少樹功舒王者多而青宮
一席尚忍言哉乃首以爭國本獲譴者禮垣羅大
紘中書黃正賓也又給事李獻可尚書李長春輩
或杖或戍一鳴輒斥甚至九臣面詰政府十四官
同時降削而神宗動加激擾之名冀箝天下之口
不特不欲建儲也因儲禮之不舉而婚冠愆期曠
不豫教其後乃令三王並封又欲二王並講女戎
伏妖蓋若是其忍乎夫易稱長子主器記美一人

元良重光重潤自古榮之而神宗乃以正天倫之語為不入耳之言深相怨毒酷罰示威則有物以蔽之也究之前星之耀漸朗摘瓜之謀不行論者以諸臣靜聽則蚤且觀成子則以諸臣力爭故久而克定也方鄭妃盛年神宗固嘗許以立愛矣而言者紛紜格不得發始則譴諍臣以快宮闈終亦未必不援朝論以謝嬖倖始則欲以神器之重酬晏私之愛究亦不能以房閨之睚廢天下之公如

是則王家屏之封還御批李騰芳之上書執政斷
當以口舌爭之者也已而妖書反間詛呪橫行緹
校勾攝紛然四出與漢治巫蠱何異嗚呼王之禎
猶江充也四明猶公孫賀也即不株累東宮而含
沙射人寧有幸乎幸生光誣服得弛羅織設事更
蔓延魚網之設鴻則離之都人士寧得安枕卧耶
比太子既建而禁不出閣者又十二年至史孟麟
請冊皇太孫猶加降謫焉蓋神宗怒未怠已



明史紀事本末卷六十七



總校官庶吉士臣張能照

校對官編修臣楊壽楠

謄錄監生臣王錡

欽定四庫全書叢要

史部

明史紀事本末卷六十八

九

詳校官員外郎臣楊世綸



欽定四庫全書薈要卷八千八百八十

明史紀事本末卷六十八

浙江提學僉事谷應泰編

三案

神宗萬曆四十三年五月己酉有不知姓名男子持棗

木棍撞入慈慶宮打傷守門內官李鑑直至前殿簷下
內官韓本用等執縛付東華門守備指揮朱雄等收之
次日皇太子奏聞命法司提問庚戌巡視皇城御史劉

廷元奏人犯供名張差係薊州井兒峪民語言顛倒形
似風狂臣再三考訊本犯呶呶稱喫齋討封等語話非
情實詞無倫次按其迹若涉風魔稽其貌的係黠猾情
境叵測不可不詳鞫重擬者乙卯刑部郎中胡士相岳
駿聲等審張差供被李自強李萬倉燒差柴草氣憤于
四月內來京要赴朝聲冤從東進不識門徑往西走適
路遇男子二人紿曰爾無憑據如何進爾拿槓子一條
來便可當作冤狀等語差日夜氣忿失志顛狂遂于五

月初四日手拿聚木棍一條仍復進城從東華門直至
慈慶宮門首打傷守門官走入前殿下被擒擬依宮殿
前射箭放彈投磚石傷人律斬決不待時戊午刑部提
牢主事王之寀言本月十一日散飯獄中未至新犯張
差見其年壯力强非風顛人初招告狀著死撞進復招
打死罷臣問實招與飯不招當饑死即置飯差前差見
飯低頭已而云不敢說臣乃麾吏書令去止留二役扶
問之招稱張差小名張五兒父張義病故有馬三舅李

外父叫我跟不知姓名老公說事成與爾幾畝地種老公騎馬小的跟走初三歇燕角舖初四到京問何人收留復云到不知街道大宅子一老公與我飯說你先衝一遭撞著一個打殺一個打殺了我們救得你遂與我棗棍領我由厚載門進到宮門上守門阻我我擊之墮地已而老公多遂被縛小爺福大又招有栢木棍琉璃棍棍多人衆等情其各犯名至死不招臣看此犯不顛不狂有心有膽懼之以刑罰不招要之以神明不招吸

之以飲食始欲默欲語中多疑似願皇上縛兇犯于文
華殿前朝審或勅九卿科道三法司會問則其情立見
矣辛酉戶部郎中陸大受言青宮何地男子何人而橫
肆手棍幾驚儲蹕此乾坤何等時耶北人好利輕生有
金錢以結其心則輕爲人死至大姦之奔走死士也或
出其技之庸庸者姑試之於死地以探其機而後繼之
以驍桀用其死力於忽不經意之處有臣子所不忍言
者張差業招一內官何以不言其名明說一街道何以

不知其處彼三老三太互為表裏而霸州武舉高順寧等今竟匿於何所變豈無因警甚非小乞皇上大振乾綱務在首惡必得邪謀永銷明肆凶人於朝市以謝天下疏中有姦戚二字上惡之與之寀疏俱不報御史過庭訓為移文薊州踪跡之知州戚延齡具言其致顛始末諸臣據為口實以風顛二字定為鐵案矣乙丑刑部司官胡士相陸夢龍鄒紹光曾曰唯趙會楨勞永嘉王之寀吳養源曾之可柯文羅光鼎曾道唯劉繼禮吳孟

登岳駿聲唐嗣美馬德澧朱瑞鳳等再審張差供稱馬
三舅名三道李外父名守才同在井兒峪居住又有姐
夫孔道住本州城內不知姓名老公乃修鐵瓦殿之龐
保不知街道大宅子乃住朝外大宅之劉成三舅外父
常往龐保處送炭龐劉在玉皇殿商量和我三舅外父
逼著我來說打上宮中撞一個打一個打小爺喫也有
著也有劉成跟我來領進去又說你打了我救得你又
有三舅送紅票封我為真人等語刑部行薊州道提解

馬三道等疏請法司提龐保劉成對鞫給事中何士晉
上言頃者張差持挺突入慈慶宮事關宗社安危皇上
宜何如震怒三事大臣宜何如計安乃旬日以來似猶
泄泄豈刑部主事王之案一疏果無故而發大難之端
耶雖事涉宮闈百宜慎重然謀未成機未露猶可從容
曲處今形見勢逼業已至此所謂亂臣賊子人人得而
誅之明主可與忠言此事寧無結局疏留中閣臣促之
上諭曰朕自聖母升遐奉襄大典追思慈恩罔極哀慕

不勝方在靜攝中突有風顛奸徒張差持挺闖入青宮
震驚皇太子致朕驚懼身心不安朕思太子乃國根本
豈不深愛已傳內宮添人守門關防不時衛護連日覽
卿等所奏姦宄叵測行徑隱微既有主使之人即著三
法司會同擬罪具奏是日刑部據臧知州回文以上壬
申上再諭法司嚴刑鞫審速正典刑時語多涉臧臣鄭
國泰國泰出揭自白給事中何士晉復奏陸大受疏內
雖有身犯姦畹克鋒等語特借此發端以明杞憂之果

驗而語及張差原止欲追究內官姓名大宅下落並未直指國泰主謀此時張差之口供未具刑曹之勘疏未成國泰豈不能從容少待輒爾具揭張皇人遂不能無疑若欲釋疑計惟明告宮中力求皇上速將張差所供龐保劉成立送法司考訊如供有國泰主謀是大逆罪人臣等執法討賊不但宮中不能庇即皇上亦不能庇設與國泰無干臣請與國泰約令國泰自具一疏告之皇上嗣後凡皇太子皇長孫一切起居俱係鄭國泰保

護稍有疎虞即便坐罪則人心帖服永無他言若今日
畏各犯招舉一惟熒惑聖聰久稽廷訊或潛散黨與使
遠遁或陰斃張差使口滅則疑復生疑將成實事惟有
審處以消後禍不報癸酉駕幸慈寧宮召見百官從御
史劉光復請也輔臣方從哲吳道南暨文武諸臣先後
至內侍引至聖母靈次行一拜三叩頭禮時上西向倚
左門柱設低座俯石闌百官復至御前叩頭上連呼曰
前來羣臣稍膝而前去御座不數武上練冠練袍皇太

子冠翼善玄冠素袍侍御座右三皇孫鴈行立左階下
上宣諭曰朕自聖母升遐哀痛無已今春以來足膝無
力然每遇節次朔望忌辰必身到慈寧宮聖母座前行
禮不敢懈怠昨忽有風癩張差闖入東宮傷人外庭有
許多間說爾等誰無父子乃欲離間我耶適見刑部郎
中趙會禎所問招情止將本內有名人犯張差龐保劉
成即時凌遲處死其餘不許波及無辜一人以傷天和
以驚聖母神位尋執東宮手示羣臣曰此兒極孝我極

愛惜御史劉光復跪於班後大言曰皇上甚慈愛皇太子甚仁孝其意固將順也上不甚悉詰問是誰中使以御史劉光復對光復猶大言不止上斥之至再光復不聞仍申前說上色頓改連呼錦衣何在者三無應者遂令中涓縛之挺杖交下上戒無亂毆但押令朝房候旨方從哲等叩頭言小臣無知妄言望霽天威怒稍解乃以手約皇太子體曰彼從六尺孤養至今成丈夫矣使我有別意何不於彼時更置今又何疑且福王既已至

國去此數千里自非宣召彼能飛至乎因命內侍傳呼
三皇孫至石級上令諸臣熟視諭曰朕諸孫俱已長成
更有何說顧問皇太子爾有何語與諸臣悉言無隱皇
太子曰似此風癲之人決了便罷不必株連又曰我父
子何等親愛外廷有許多議論爾輩為無君之臣使我
為不孝之子因謂羣臣曰爾等聽皇太子語否又述
東宮言連聲重申之羣臣跪聽未起上屢顧問者令續
到官皆放進無阻以故後來者踵趾相錯班行稍右與

帝座遠上又持皇太子面向右問曰爾等俱見否衆俯
伏謝乃命諸臣同出甲戌決張差于市乙亥上命司禮
監會九卿三法司于文華門前鞫審龐保劉成保原名
鄭進成原名劉登雲其與差飯及木棍引進等語俱轉
展不招方審問東宮傳諭曰張差持棍闖宮至大殿簷
下當時就擒並無別物其情實係風顛誤入宮闈打倒
內寺罪所不赦後招出龐保劉成本宮反覆叅詳保成
身係內官雖欲謀害本宮於保成何益此必保成素曾凌

虐於差故肆行報覆之謀誣以主使本宮念人命至重
造逆大事何可輕信連日奏求父皇速決張差以安人
心其誣舉龐保劉成若一槩治罪恐傷天和况姓名不
同當以讐誣干連從輕擬罪奏請定奪則刑獄平本宮
陰隲亦全矣六月戊子刑部審馬三道李守才孔道以
左道從律論應流李自強李萬倉應答從之尋斃龐保
劉成于內庭王之寀為科臣徐紹吉臺臣韓浚所糾部
處閑住中旨特黜為民補何士晉於外著刑部重擬劉

光復罪奪刑部侍郎張問達俸既而釋光復于獄

熹宗天啟元年閏二月御史魏光縉上言父母之仇不共戴天忠臣事君有死無二先皇帝以長君當主何嫌何疑而無端燕啄王孫瓜抱空蔓奸人搆煽每思為所欲為海內正人君子一有指斥輒以東林淮上為阱驅除既盡釀禍遂烈並封妖書之事張差挺擊之謀九廟有靈旋即撲滅而招據黃花山圍聚之逆謀三十六都頭内外多人之布列棗木栢木棍之凶器打死小爺之

逆詞洞心賊目此時稍有人心謂宜請劍殺賊乃諸臣精神不用之以護青宮而偏用之以庇奸黨不用之以伸法令而偏用之以難問官首捏風癩以為張本司官望風承旨曲意偏護改黨內為教內都頭為香頭許地三十五畝已載入招又復割去致張差以首搶地謂同謀做事事敗獨死竟付之不問也主事王之寀懼為赤族之誅明言入告而諸奸恨不附已巧借察典追奪誥命主事李倬聲言處分勒令致仕郎中陸大受張廷上

疏告變張廷卒以憂死而大受又以大計黜去嗟嗟逆
君者有罪發奸者何罪借風癩漏獄詞者有罪抒公憤
捐身命者何罪是非不兩立之案非則張差是矣之案
當罪則張差當賞矣况此一事也拿賊奏聞者先帝請
下法司者先帝皇祖曾不以先帝之請為非而為之決
張差殲奸監凡十年不御之朝堂一旦召見羣臣面行
撫慰然則皇祖之於此事亦曉然明白特諸臣以風癩
二字無所歸著故寧寬賊徒而罪之案耳聖明在御恩

及林藪建言受杖之人先後光明而三臣去國孤踪不
蒙昭雪此忠臣義士所以感憤而不平也伏乞皇上立
賜擢用以為忘身殉國之勸若僥倖有人終從禁錮亦
須明白此案於天地間使人知三臣心事亦曾有人議
之者即三臣終老巖穴無恨若區區一官三臣自誓之
日業已棄擲而今日乃欲以腐鼠嚇之乎嗟嗟之寀本
無罪而諸臣強名之曰罪楊連本無功而諸臣強名之
曰功有罪者去有功者亦去則為今之臣必當何如而

後可乎臣願與天下萬世共質之上可其奏

二年二月刑部主事王之霖上言乙卯之變先帝安危在於呼吸鄭國泰私結劉廷元劉光復姚宗文等無復忌憚遂欲睥睨神器化家為國國泰雖死法應開棺斷尸僂其族赅其官以為人臣大逆不道之戒總之用藥之方即通問之術通問之術即挺擊之謀向使張差事發窮究根株今日之盧受崔文昇敢復爾哉長安公論有曰風癩二字欲抹殺亂臣賊子就廷元評廷元也奇

貨無功四字欲抹殺忠臣義士就光復評光復也擊不
中而假之牒牒勢緩而促之藥是昇之藥慘於差之棍
是受之書烈於哲之書也張差之前從無張差劉成之
後豈無劉成亂賊接踵而皇上孤立於朝矣又言郎中
胡士相等主風癲者也堂官張問達調停風癲者也寺
臣王士昌疏忠而心佞評無隻字頌多溢詞堂官張問
達語轉而意圓先允風癲後寬奸宄勞永嘉岳駿聲等
同惡相濟張差招有三十六頭兒則胡士相閣筆招有

東邊一起幹事則岳駿聲言波及無辜招有紅封票高
真人則勞永嘉言不及究紅封教今高一奎見監薊州
係鎮朔衛人蓋高一奎主持紅封教者也馬三道管給
紅票者也龐保劉成供給紅封教多人撒棍者也諸奸
亦有人心者以堂官對衆手單而改之以十八人會審
公單而增減之大逆不道非止大不敬也疏入上不問
五月御史馬逢臯給事中張鵬雲交章劾劉廷元吏部
尚書張問達覆奏廷元倡論保奸降調

五年春正月御史楊維垣劾張差一案王之案偉功蹤躋誣皇祖負先帝不惟無功抑且有罪又曰從來君臣父子之間間以理喻未聞以勢激也投鼠者既不忍器則騎虎者豈復擇音彼中夜之泣何求不獲是先帝之危不危於張差之一挺而危於之案之一激也即碎之案之骨豈足贖哉疏入削之案籍五月原任刑部郎中岳駿聲復申挺擊始末疏入起用王之案逮訊追贓之案竟以重譴死

夏允彝曰挺擊之事王之案所詢張差其言甚悉刑部各司官會鞫時亦多相合於是舉朝喧然以為國戚有專諸之意貴妃亦危懼訴於上上命自白之太子貴妃見太子辨甚力貴妃拜太子亦拜且拜且泣上亦掩泣為斃二璫以解而攻東林者言上於貴妃盛時曾許以立愛晚而媿言之不符也因勸貴妃廣修佛事且助其費上發銀十萬建祠二璫以為磚瓦甚多不若置窖自造利甚奢居民多鬻薪於璫者張

差賣田貿薪亦往市於璫土人忌之焚其薪差訟土人於璫璫復嚴責差差以產破薪焚訟又不勝憤憤持挺入宮欲告御狀不意闖入東宮事亦不可知然東宮雖侍衛蕭條何至使外人闖入乎諸臣危言之使東宮免意外之虞國戚懷惕若之慮斷斷不可少顧事聯宮禁勢難結案若必誅外戚廢親藩度能得之於神宗乎從古有明行之法有必不可明行之法則田叔燒梁獄詞亦調停不得已之術何者光宗固

無恙尚可以全骨肉也乃彼劉廷元韓浚輩必斥逐執法者而後已是何心與

神宗萬歷四十八年八月丙午朔光宗踐祚先是七月
先宗遵遺命封皇貴妃鄭氏為皇后命禮部查例鄭貴
妃進美女四人乙卯上不豫召醫官陳璽等診視丁巳
上力疾御門視事聖容頓減己未內醫崔文昇下通利
藥上一晝夜三四十起支離牀褥間辛酉上不視朝輔
臣方從哲等赴宮門候安有數夜不得睡日食粥不滿

孟頭目眩暈身體罷軟不能動履之旨乙丑鄭養性請
收還皇貴妃封后成命允之刑部主事孫朝肅徐儀世
御史鄭宗周上書方從哲責以用藥乖方之故給事中
楊漣上言賊臣崔文昇不知醫不宜以宗社神人托重
之身妄為嘗試如其知醫則醫家有餘者泄之不足者
補之皇上哀毀之餘一日萬幾於法正宜清補文昇反
投相伐之劑然則流言藉藉所謂興居之無節侍御之
蠱惑必文昇藉口以蓋其悞藥之奸冀掩外庭攻摘也

如文昇者既益聖躬之疾又損聖明之名文昇之內其
足食乎臣聞文昇調護府第有年不聞用藥謬誤皇上
一用文昇倒置若此有心之誤耶無心之誤耶有心則
齏粉不足償無心則一誤豈可再誤皇上奈何置賊臣
肘腋間哉丁卯傳錦衣官宣兵科楊漣并召輔臣方從
哲劉一璟韓爌英國公張維賢尚書周嘉謨李汝華孫
如游黃嘉善黃克纘都御史張問達給事中范濟世御
史顧慥等時廷臣疑上且杖漣既入上目視漣久之各

諭以國家事重卿等盡心朕自加意調理辛未再召見
羣臣於乾清宮上御東暖閣倚榻憑几皇長子侍立上
命諸臣前連諭曰朕見卿等甚喜從哲等請皇長子移
宮上曰令他別處去不得請慎醫藥上曰十餘日不進
矣久之又諭冊封李選侍諸臣退二十九日甲戌上再
召諸臣等於乾清宮仍諭冊立皇貴妃從哲等以冊儲
原旨期宜改近蚤竣吉典以慰聖懷上因顧皇太子諭
曰卿等輔佐為堯舜又語及壽宮輔臣以皇考山陵對

則自指曰是朕壽宮諸臣言聖壽無彊何遽及此上仍諭要緊者再因問有鴻臚寺官進藥何在從哲奏鴻臚寺丞李可灼自云仙丹臣等未敢輕信上即命中使宣可灼至胥視具言病源及治法上喜命趨和藥進上飲湯輒喘藥進乃受上喜稱忠臣者再諸臣出宮門外竢少頃中使傳聖體用藥後煖潤舒暢思欲飲膳諸臣歡躍而退可灼及御醫各官留時日已午比未申可灼出輔臣迎訊之可灼具言上恐藥力竭復進一丸亟問復

何狀可灼以如前對五鼓內宣急召諸臣趨進而龍馭以卯刻上賓矣時九月乙亥朔也中外藉藉以李可灼悞下劫劑恐有情弊而方從哲擬旨賞可灼銀五十兩御史王安舜首爭之疏曰醫不三世不服其藥先帝之脉雄壯浮大此三焦火動面唇赤紫滿面火升食粥煩燥此滿腹火結宜清不宜助明矣紅鉛乃婦人經水陰中之陽純火之精也而以投於虛火燥熱之症幾何不速之逝乎然醫有不精猶可藉口臣獨恨其膽之大也以

中外危疑之日而敢以無方無製之藥駕言金丹輕亦
當治庸醫殺人之條乃蒙殿下頒以賞格臣謂不過借
此一舉塞外廷之議論夫輕用藥之罪固大而輕荐庸
醫之罪亦不小不知其為謬猶可言也以其為善而荐
之不可言也疏入乃改票罰俸一年而議者蠶起矣御
史鄭宗周上言往歲張差之變操樵禁門幾釀不測之
禍祇以皇祖優容未盡厥罪故文昇尤而效之臣請寸
斬文昇以謝九廟臣非謂誅一文昇遂足以申國憲而

消逆萌第恐張差之後因有文昇今文昇復置不問奸人
得志何所憚而不為也從哲擬旨下司禮監於是御史
郭如楚主事呂維祺交章論崔文昇李可灼 壬午給
事中惠世揚劾奏輔臣方從哲言鄭貴妃包藏禍心先
帝隱忍而不敢言封后之舉滿朝倡義執爭從哲兩可
其間是徇平日之交通而忘宗社之隱禍也無君當誅
者一李選侍原為鄭氏私人麗色藏劍且以因緣近倖
之故欺抗先聖母從哲獨非人臣乎及受劉遜李進忠

盜藏美珠夜半密約封妃不得佔居乾清是視登極為
兒戲而天子不如宮嬪也無君當誅者二崔文昇輕用
剝伐之藥廷臣交章言之從哲何心必加曲庇律之趙
盾許世子何辭弑君之罪無君當誅者三癸巳南京太
常寺少卿曹珍請究醫藥奸黨

熹宗天啟元年春正月御史焦源溥請誅崔文昇

十月丁卯御史傅宗龍馬逢臯李希孔交章請誅崔文
昇

二年夏四月光祿少卿高攀龍上言崔文昇故用泄藥
元氣不可復收是明以藥弑也在律故違本方殺平人
者死况至尊乎陛下不即誅僇僅止斥逐今文昇復潛
住京師意欲何為往者張差謀逆實係鄭國泰主謀劉
保謀逆實係盧受主謀受鄭氏人不可掩也文昇素為
鄭氏腹心特當時失刑不及拷訊其罪豈在張差劉保
下乎不聽 禮部尚書孫慎行上言皇考賓天雖係夙
疾實緣醫人進藥不審邸報有鴻臚寺官李可灼進紅

藥兩丸乃原任大學士方從哲所進凡進御藥太醫院
官呈方簡明恐致失誤可灼非用藥官也丸不知何藥
物而乃敢突以進春秋許世子進藥於父父卒世子自
傷與弑不食死春秋尚不少假借直書許世子弑君然則
從哲宜何如處焉速劒自裁以謝皇考義之上也闔門
席藁以待司寇次也而乃晏然支辨至滿朝政可灼僅
票回籍調理豈以已實荐灼恐與同罪夫已與可灼可
愛而皇考可忍乎臣謂縱無弑之心却有弑之事欲辭

弑之名難免弑之實即忠愛深心欲為君父隱諱不敢
不直書云方從哲連進紅藥兩丸須臾帝崩恐百口無
能為天下萬世解矣且從哲所不能解者非獨此也先
是則有傳皇貴妃欲立皇后事夫祖制未有以妃為后
者亦未有帝崩立后者貴妃寵幸數十年皇祖英明不
聞有楚歌楚舞唏噓之態即彌留之際尚不能因緣微
幸而突傳此旨觀禮部疏云輔臣方從哲傳其言可思
若非禮部執爭諸科道力責貴戚上章請免幾何不誤

立皇后貼社稷憂此從哲不能為天下萬世解者一也
又有議上尊諡稱恭皇帝夫宋之恭端將亡哀主晉主
降宋隋主降唐周主降宋俱為恭帝皇祖四十八年平
倭平播平寧夏豈無他懿美可稱而比降王逋裔若非
言官預糾便應如議詛咒君國等於弁髦此從哲不能
為天下萬世解者二也又有選侍垂簾聽政事夫選侍
宮中何知前代有垂簾事即劉遜李進忠小豎何遂膽
大揚言言者以為從哲實教之從哲即未肯承然以顧

命元臣曾不聞慷慨一言任婦寺之縱橫忍冲主之机
桎此從哲不能為天下萬世解者三也以此三事例彼
進藥相臣所宜急擔當之事一切苟且泄沓相臣所宜
極慎重之事反覺勇往直前春秋無將漢法不道真無
以過伏乞皇上下奮乾綱赫然震怒毋訪近習近習其
攀援也毋畏忌諱忌諱其布置也如臣言有當乞將從
哲大正肆放之罰速嚴兩觀之誅併將李可灼嚴加拷
問置之極刑如臣言無當即以重典治臣亦所甘受矣

奉旨會議具奏左都御史鄒元標上言臣聞乾坤所以
不毀者恃此綱常而綱常所以植立者恃此信史臣舟
過南中諸士縉爭言先帝卒然而崩大事未明難以傳
信臣謂先帝无妄之藥迹或有之而以誅心之法例之
臣未忍聞既入都門聞諸臣曰說到先帝大事令人閣
筆說到壬辰以後諸相事令人閣筆誰敢領此臣益復
致疑近讀孫慎行一疏令人神骨為悚即未必有是心
當時依違其間不申討賊之義反行賞奸之典無以解

人之疑方從哲秉政七年未聞輔相何道但聞一日馬上三書催戰將祖宗櫛風沐雨一片東方盡致淪沒試問誰秉國鈞而使先帝震驚使張差闖宮使豺狼當道使宵人亂政使潛鱗駭浪將何辭以對從哲近在肘腋羣陰密布臣投林一世耻言人過豈敢過求從哲惟是臣身為風憲之官名在會議之列畏禍緘口勢所不能君臣太義今日不明再無有明之日臣官不言再無有言之人臣亦知陛下隆禮舊輔未必能毅然立斷諸輔

同籍同官未必能捐情立剖易曰益之用凶事凶事政所以益之也臣讀學士公鼐疏曰六七年間以言及東宮者為小人不言東宮者為君子此何等景象是誰使之又云盡除天下之清流陰剪元良之羽翼此真實錄真史筆也從來亂臣賊子有所懲戒者全在青史臣不知忌諱為先帝計為陛下萬壽無疆計為天下萬世君臣計為寒將來奸臣賊子之膽殺將來奸臣賊子之謀計疏入方從哲上疏辨自請削奪投諸四裔以禦魑魅

時九卿科道會奏久延給事中魏大中速之曰禮臣孫
慎行痛先帝崩殂討舊輔方從哲以春秋之法皇上命
諸臣據實回報何以迄今未奏也蓋先帝之棄羣臣在
庚申九月之朔日而率土忠義之驚心者已在乙卯五
月之四日自前日之挺不中而圖所以中者百端至藏
魖毒於女謁俟元精耗損憊不可支而蕩以暴下之劑
爍以純火之鉛先帝彌留而不起矣然則張差崔文昇
諸人先帝之賊也自乙卯以迄庚申其時執政者誰討

賊者誰何以迄今未奏也且非獨不討而已酬可灼以
賞賜獎可灼以忠愛寬可灼以罰俸優可灼以養病而
崔文昇者代為委之於先帝之宿疾至一至再夫以數
十年忠肝義膽所羽翼之賢良數十日深山窮徼所謳
吟之堯舜一旦戕於二賊之手從哲不能討反從而護
之從哲真無人心者何以迄今未奏也春秋之法誅意
闡入慈慶非張差之意固鄭國泰之意也投劑益疾非
崔文昇之意固鄭養性之意也而執政者何以不問也

春秋之法誅賊必誅夫賊之所恃今造意者何所恃黨賊者何所恃恃從哲也不必紅鉛之進出從哲之意而從哲已為罪之魁也何以迄今未奏也李可灼之藥不合之崔文昇不備崔文昇之逆不遡之張差不明鄭國泰鄭養性方從哲之罪不叅之三案不定不悉崔文昇之情罪不下張差而李可灼次之如是而朝廷所以處從哲與從哲之所以自處者可以權衡其間矣何以迄今未奏也時先後彈者主事王之宗劉宗周給事中周

希令彭汝南傳檄御史吳甦薛文周沈應時方有度安
伸溫臯謨江日彩張慎言會議駁正者尚書王紀汪應
蛟王永光侍郎楊東明陳大道李宗延張經世陳邦瞻
太僕卿蕭近高張五典少卿申用懋于倫李之藻歸子
顧劉策孫居相周起元田生金柯晷滿朝薦熊明遇黃
龍光太常少卿高攀龍給事中劉弘化霍守典御史蔣
允儀劉徽李玄等於是吏部尚書張問達會戶部尚書
汪應蛟等公奏畧曰禮臣孫慎行首論李可灼進紅丸

事可灼先見內閣臣等初未知至奉皇考宣召於乾清宮輔臣與臣等乃共言可灼進藥多言不可進或言可進俱慎重未敢決又宣臣等進宮內跪御榻前諭臣等輔皇上為堯舜隨問寺官李可灼何在可灼至視疾進紅丸少頃又進一丸至申聞聖體服藥後微汗身覺溫熱就寢此進藥之始末臣等所共見聞者是時輔臣視皇考之疾急迫倉皇悽然共切弑逆二字何忍輕言但以我皇考之身可灼輕進嘗試從哲未能力止九卿與

輔臣并候於宮門內亦未能力止諸臣均有罪焉至於
可灼之處分中外共痛之憾之乃臺臣王安舜上疏力
爭先票罰俸繼票養病去則失之輕失之輕故即按其
輕而罪其不盡法處也不重處可灼何以慰皇考服中
外而正大法輔臣於辨疏後自請削奪以釋中外之疑
臣等謂應如輔臣之請為法任咎是亦大臣引罪之道
所宜爾至於選侍欲垂簾聽政吏部九卿公疏請移宮
科道專疏請移宮皇上允其奏諸臣共快之然其心猶

以輔臣之奏不毅然為諸臣倡也倘其時非諸臣共扶大義乾清何地令其竊靈威福又將如我皇上登極還宮何哉夫李可灼非醫官也非知脈知醫者也一旦以紅丸進希圖非望之福而龍馭上昇攀號無及可灼罪勝誅乎應即勅行法司究問以正刑章崔文昇當皇考哀感傷寒之時進大黃涼藥可灼輕進紅丸不加詳察罪又在可灼上矣法應逮文昇於法司從重究擬以三尺除二惡肅綱紀而洩公憤庶中外之心可以釋輔臣

之心可以明議上李可灼法司究問崔文昇仍發遣南京是時與從哲合者刑部尚書黃克纘詹事公鼐御史王志道徐景濂給事中汪慶百十月李可灼遣戍

五年四月免李可灼戍十一月尚寶司少卿劉志選劾原任禮部尚書孫慎行倡不嘗藥之說妄疑先帝不得正其終更附不討賊之論輕詆皇上不得正其始并侵及葉向高張問達命宣付史館

懷宗崇禎元年三月太監崔文昇下獄戍南京初魏忠

賢擅權復以文昇督漕運至是敗

谷應泰曰光宗方諒闇鞠凶哀勞毀瘁而宮中巧相蠱惑更進女尤於是罷免常朝輒脚致疾一月之內玉几再憑梓宮兩哭嗚呼斯亦皇家之不幸也考其時提督御藥房橫加攻泄者內侍崔文昇也泊乎疾漸彌留氣息纔屬而玉椀初調金甌不御者李可灼也然而光宗之疾無文昇或猶可以倖生而却可灼亦難免於必死者蓋文昇之調護

在初而可灼之救援已劇也善乎吳姓之言曰文
昇故用泄藥可灼誤進紅丸故以藥之補泄相較
則大黃之尅過於紅鉛而以事之早晚相衡則文
昇之辜浮於可灼此時為政府者宜援憲宗柳泌
之事純皇李牧省之獄論坐文昇薄譴可灼伸嗣
主之叫號慰域中之哀痛則其法平矣而奈何文
昇保全可灼蒙賚掩罪為功一至此乎夫庸醫殺
人律應永錮拙工誤治俗奮老拳何嘗疑其別有

主使內叢酖毒而情有所激法不得貸獨奈何宮車
晚出銀幣蚤膺崇德報功義於胡有執筆者不學
無術甚愚鮮量矣宜諸臣之起而攻之也夫諸臣
以攀髯之忠矢批鱗之奏小雅傷時幾於誹怨嬰
兒哭母失其常聲過於騷激無足怪者至若以文
昇可灼之不慎而即比之王莽之椒酒梁冀之煮
餅則深文周内不無傷於好盡矣語云吾黨兩分
其過可也

光宗泰昌元年八月乙卯上不豫傳諭禮部曰選侍李氏侍朕勤勞皇長子生母薨逝後奉先帝旨委托撫育視如親子厥功懋焉其封為皇貴妃欽天監擇九月初六日行乙丑主事孫朝肅徐世儀御史鄭宗周上書輔臣方從哲請冊立皇太子且移居慈慶宮庚午上召閣部九卿至榻前諭曰選侍數產不育止存一女隨傳皇長子出見上又言皇五子亦無母亦是選侍撫育傳皇五子出見辛未上召諸臣於乾清宮又諭速封選侍禮

臣孫如游奏臣部前奉聖諭上孝端顯皇后孝靖皇太后尊謚加封郭元妃王才人為皇后皆未告竣宜俟四大禮舉行之後若論皇儲保護功則選侍之封惟恐不早即從該監之請未為不可上命如前期甲戌上再召諸臣於乾清宮仍諭封皇貴妃語未既選侍披幃立呼皇長子入咄咄語復趨之出皇長子向上曰要封皇后上不語九月乙亥朔上崩給事中楊漣語周嘉謨李汝華曰宗社事大李選侍非可托少主者急宜請見嗣主呼萬

歲以安危疑隨擁出宮移住慈慶為是二臣然之以語
方從哲漣遂先諸臣排闥入閣豎挺亂下漣厲聲曰皇
帝召我等至此今晏駕嗣主幼小汝等阻門不容入臨
意欲何為閣者却諸臣乃入哭臨畢請見皇長子皇長
子為選侍阻於煖閣不得出青宮舊侍王安給選侍抱
持以出諸臣即叩頭呼萬歲皇長子曰不敢當羣臣共
請詣文華殿王安擁之行閣臣劉一燝掖左勲臣張維
賢掖右內侍李進忠傳選侍命名還皇長子者三喝諸

臣曰汝輩挾之何往漣叱之共擁皇長子登輿至文華殿皇長子西向坐羣臣禮見畢請即日登極不允諭初六日即位復擁入慈慶宮一燂奏曰今乾清宮未淨殿下請暫居此嘉謨曰今日殿下之身是社稷神人托重之身不可輕易即詣乾清宮哭臨須臣等到乃發皇長子首肯漣語中官曰外事緩急在諸大臣調護聖躬在諸內臣責有所歸王安等踴躍稱諾諸臣退諸臣有議即日正位者令中官再傳不允衆皆朝服待命少卿徐

養量御史左光斗唾漣不宜阻今日即位漣恐語錦衣
帥駱思恭嚴緹騎內外防護丙子尚書周嘉謨等合疏
請選侍移宮左光斗上言內廷之有乾清宮猶外廷之
有皇極殿也惟皇上御天居之惟皇后配天得共居之
其餘妃嬪雖以次進御遇有大故即當移置別殿非但
避嫌亦以別尊卑也今大行皇帝賓天選侍既非嫡母又
非生母儼然居正宮而殿下乃居慈慶不得守几筵行
大禮名分倒置臣竊惑之且殿下春秋十六齡矣內輔

以忠直老成外輔以公孤卿貳何慮乏人尚須乳哺而
襁負之哉即貴妃之請許於先皇彌留之際其意可知
且行於先皇則俯錫之名猶可行於殿下則尊奉之稱
有斷斷不可者倘及今不早斷借撫養之名行專制之
實武后之禍將見於今上諭移宮已有旨冊封事既云
尊卑難稱著禮部再議給事中暴謙貞抄叅曰大寶將
登上有百靈呵護下有羣工擁戴亦何用此婦人女子
為且聞選侍非忠誠愛國者萬一封典得行事權或假

則滋蔓難圖慎終慮始事屬可已抄出寢之戊寅選侍
用李進忠謀邀皇長子同宮王安忿然宣言且逮楊左
楊漣遇進忠於宮門問選侍移宮何日進忠搖手曰李
娘娘怒甚今母子一宮正欲究左御史武氏之說漣叱
曰誤矣幸遇我皇長子今非昨叱選侍移宮異日封號
自在且皇長子年長矣若屬得無懼乎進忠默然去科
道惠世揚張潑從東宮門來駭傳今日選侍垂簾遲光斗
漣曰無之已卯選侍尚無移宮意楊漣上言先帝升

遐人心危疑咸謂選侍外托保護之名陰圖專擅之實
故力請殿下暫居慈慶欲先撥別宮而遷之然後奉駕
還宮蓋祖宗之宗社為重宮幃之恩寵為輕此臣等之
私願也今登極已在明日矣豈有天子偏處東宮之禮
先帝聖明同符堯舜徒以鄭貴妃保護為名病體之所
以沉錮醫藥之所以亂投人言藉藉至今抱痛安得不
為寒心此移宮一事臣言之在今日殿下行之亦必在
今日閣部大臣從中贊決毋容泄泄以負先帝張几輔

殿下之託亦在今日疏上漣復往趨方從哲從哲曰待
初九十二亦未晚漣曰天子無復反東宮禮選侍今不
移亦未有移之日此不可頃刻緩者內侍曰獨不念先
帝舊寵乎漣怒曰國家事大豈容姑息且汝輩何敢如
是聲徹大內皇長子使人諭漣出命司禮監按盜藏諸
侍收李進忠劉遜等選侍移居仁壽殿己亥御史賈繼
春上書輔臣曰天地之大德曰生聖人之至德曰孝先
帝命諸臣輔皇上為堯舜夫堯舜之道孝弟而已矣父

有愛妾其子終身敬之不忘先帝之於鄭貴妃三十餘年天下側目之隙但以篤念皇祖渙然冰釋何不輔皇上取法而乃作法於涼縱云選侍原非淑德夙有舊恨此亦婦人女子之常態先帝彌留之日親向諸臣諭以選侍產有幼女歔歔情事草木感傷而況我輩臣子乎伏願閣下委曲調護令李選侍得終天年皇幼女不慮意外辛丑御史左光斗上言選侍既移宮之後自當存大體捐其小過若復株連蔓引使宮闈不安是於國體

不便亦大非臣等建言初心伏乞皇上宣召閣部九卿
科道面諭以當日避宮何故今日調御何方不得憑中
使口傳聖旨正劉遜李進忠法其餘槩從寬政庶幾燒
梁獄之詞者正以寢淮南之謀疏入上傳諭內閣朕幼
冲時選侍氣凌聖母成疾崩逝使朕抱終天之恨皇考
病篤選侍威挾朕躬傳封皇后朕心不自安暫居慈慶
選侍復差李進忠劉遜等命每日章奏文書先奏選侍
方與朕覽朕思祖宗家法甚嚴從來有此規制否朕今

奉養選侍於噉鸞宮仰遵皇考遺愛無不體悉其李進忠田詔等盜庫首犯事干憲典原非株連卿可傳示遵行輔臣方從哲讀諭驚愕具揭封進言皇上既仰體先帝遺愛不宜暴其過惡傳之外庭上再諭發抄南京御史王允臣糾從哲曰陛下移宮後發一聖諭不過如常人表明心迹之意而宰相輒自封還司馬昭之心路人知之十月丁卯噉鸞宮災上諭選侍皇妹俱無恙十一月丁亥給事中周朝瑞以賈繼春之揭謂其喜樹

旌旗安生題目繼春復揭曰保全選侍蓋亦人倫天理
布帛菽粟之言非旌旗題目也朝瑞揭駁之曰安選侍
者猶謂之是安宗社者顧謂之非乎繼春再揭曰主上
父子相繼宗社何嘗不安而必待傾選侍以安之即移
宮原是正理豈必移時驅逐革其已進儀注之貴妃因
其無端羅織之老父伶仃之皇八妹入井誰憐孀寡之
未亡人雉經莫訴朝瑞又揭謂繼春操戈於解忿平爭
者繼春又揭職非操戈乃止戈也聖德無損為臣子者

同心為國有何不解之忿不平之爭而煩左右袒之費詞乎 刑部尚書黃克纘執奏鄭穩山劉尚禮姜昇劉遜四人罪名當從末減不允克纘執奏如初因言父母並尊事有出於念母之誠迹似涉於忘父之過必委曲周旋使渾然無跡方為大孝因力求罷 十二月乙卯都給事楊漣疏曰前選侍移宮一事護駕諸臣知之外廷未必盡知及今不一昭明將以今日之疑端成他時之實事臣蒙先帝召見目擊當日情形敢不一語憶先

帝憑几之言間及選侍而再四叮嚀則曰輔皇上要緊
選侍忽從門幔中手挽皇上而入復推而出隨有要封
皇后之言諸臣相顧錯愕夫君臣正相引痛之時忍於
要挾求封一旦事權在握豈僅僅虛名足稱其意此八
月二十九日事也迨九月初一日子夜先帝急召諸臣
而龍馭上賓矣此時主君為重宜急於請見一見即呼
萬歲以慰人心而宮門內使乃有持挺不容入者臣冒
犯忿詈與爭此初一日卯刻入宮事也諸臣哭臨畢請

見皇上於寢門拜呼萬歲天語不敢當者三諸臣捧龍
軒至文華殿門行呼嵩叩頭禮已而大小臣工共祈皇上
即日登極上傳諭卜期而諸臣皇皇深以未登極為危
蓋先帝變出倉卒上無聖母之憑依中無皇后之慰藉
在旁窺伺誰為可恃此初一日辰刻事也爾時諸臣議
皇上宜歸何宮臣思選侍推挽景象又習聞其上有深
相結交之貴寵乃云從來冲齡天子不宜託之素無恩
德之婦人且選侍如可託皇上必深知之雖強之離而

不得如不可託雖強之留而亦不可得而聖駕果徑歸
慈慶宮矣此初一日巳刻事也御極卜期初六至初二
日九卿科道有移宮之請御史左光斗有移宮之請蓋
因皇上一正九五斷無避宮而又不可同居至初五日
期且迫矣臣是以有正位叅及李進忠等之疏總以宮
嬪自有定分即加恩選侍原不在宮之移與不移假令
登極之後而宮嬪悍然居天子之宮天子居青宮非理
歸乾清不得尚得朝廷尊而體統正乎此初五日午刻

臣從諸臣於慈慶宮前憤爭事也至本日移宮臣即語諸大臣移宮自移宮隆禮自隆禮必兩者相濟而後二祖列宗之大寶始安先帝在天之靈始妥即本日緝獲罪璫只宜殲厥渠魁無滋蔓引大抵宸居未淨先帝之社稷付託為重則平日之寵愛為輕及其宸居已定既盡臣子防危之忠即當體皇上如天之度今諸大臣猶在耳也臣之所以議移宮者始終如此乃移宮之後忽有蜚語有倡選侍徒跣踉蹌欲自裁處皇妹失所至於

投井者或傳治罪璫過甚者或稱內外交通者使夙夜
憂時之士悞收為一時感慨嘆息之言作此日不白之
案九廟神靈鑒此熱血若夫緝拏罪璫此譬如人家主
人謝世羣僕乘間竊其帑藏主人之子偶一究問只在
法司得其平耳於選侍恩禮何與臣謂寧可使今日惜
選侍無使移宮不早不幸而成女后垂簾之事彼三十
餘年憑依蟠結之羣邪又得以因緣多事於以保惜先
帝寵愛則得矣而輔皇上要緊之深意在天之靈果以

此為愉快耶况兩奉聖諭選侍居食恩禮有加噉鸞宮
火復奉有選侍皇妹無恙之旨方知皇上雖念及於孝
和皇太后之哽咽仍念及於光宗先帝之唏歔海涵天
蓋盡仁無已伏乞皇上採臣懇言更於皇弟皇妹時勤
召見諭安不妨曲及李選侍者酌加恩數遵愛先帝之
子女當亦聖母所共喜者疏上下旨褒諭又特諭廷臣
曰朕冲齡登極開誠布公不意外廷乃有謗語輕聽盜
犯之訛傳釀成他日之實錄誠如科臣楊連所奏者朕

不得不再伸諭以釋羣疑九月初一日皇考賓天諸臣
入臨畢請朝見朕李選侍阻朕於煖閣司禮官固請
選侍許而後悔又使李進忠請回者至再至三朕至乾
清宮丹陛上大臣扈從前導選侍又使李進忠來牽朕
衣卿等親見當時景象安乎危乎當避宮乎不當避宮
乎是日朕自慈慶宮至乾清宮躬視皇考入殮選侍又
阻朕於煖閣司禮監王體乾固請得出初二日朕至乾
清宮朝見選侍畢恭送梓宮於仁壽殿選侍差人傳朕

必欲再朝見方回各官皆所親見明是威挾朕躬垂簾聽政之意朕蒙皇考命依選侍朕不住彼宮飲食衣服皆皇祖皇考所賜每日僅往彼一見因之懷恨凌虐不堪若避宮不早則彼爪牙成列盈虛在手朕亦不知如何矣既毆崩聖母每使宮眷王壽花等時來探聽不許朕與聖母舊人通一語朕苦衷外廷不能盡知今停封以慰聖母之靈奉養以尊皇考之意該部亦可以仰體朕心矣臣工私於李黨不顧大義諭卿等知之今後毋

得植黨背公自生枝節時方從哲在告劉一燝等上言
皇上嗣位以來宮禁肅清乃以形跡影響之疑互相紛
辨致厯聖懷伏讀聖諭當年宮掖事情及頃者避宮景
象悽惋危衷宛然在目諸臣徒以事後論安危謂周防
為多事皇上責以猜疑輕聽誠恐有之若云庇護黨私
則萬萬不敢也御史王業浩上言先帝毓德青宮止孝
止慈何以一女子之微致生枝節如聖諭派與照管并
毆崩聖母等語天下萬世不察則先帝御家之盛德不

無少損且父母之讐不共戴天普天率土俱有同仇之義而聖諭至此且曲處如此則前日之肅清既未得為義之盡今此之優厚亦不得為仁之至外廷臣工比肩事主至分目之曰安社稷安選侍臣恐水火之情形既判玄黃之戰辯方興奏留中庚午都給事楊漣乞歸疏曰垂簾之秘事未聞入井之煩言嘖起臣不過發明移宮始末使了然在人耳目而旋荷綸綍之褒過邀忠直之譽使臣區區之苦心反為夸詡臣節之左券臣之不安

一也當時首請御文華殿受呼嵩者周嘉謨等也初出
乾清宮捧皇上左右手者張維賢劉一燝也臣乃以憤
爭之故獨受忠直之名俯慙卑末豈可掩人於朝仰藉
清平豈可貪天為力臣之不安二也宮禁自就清肅社
稷有何桎杻而聖諭以志安社稷為言君幸有子不憂
杞國之天臣獨何人敢捧虞淵之日臣之不安三也臣
引分自思俯全臣節惟有決去一著而已臣蹇窮骭體
之人披上方之文綺賁兩朝之賜金步歸里門以忠直

二字出告親友入教子孫真覺俯仰皆寬即不幸先犬馬填溝壑持此二字以報皇考於在天見先人於地下臣亦可瞑目安寢矣臣無病不敢以病請皇上未罪臣又不敢以罪請惟有明微薄之心跡乞浩蕩之恩波放臣為急流勇退之人而已詔許之

熹宗天啟元年春二月御史賈繼春直陳具揭之實奉旨切責繼春復上言臣初入班行當移宮之後祇因痛切先帝急欲効忠皇上及捧讀聖諭乃知天地之高厚

曲為保全而小臣之狂愚猶妄有規勸謹備錄原揭回
話上以其疏中無雉經入井二語著再回話夏四月吏
部尚書周嘉謨及九卿科道會議云繼春席藁待罪懇
請優容仍下旨切責落職永不叙用四年夏四月大理
寺少卿范濟世請遵遺命封李選侍為妃下旨切責先
是光宗青宮舊監王安強直不阿選侍魏忠賢既矯殺
之乃盡反其所為會楊漣上疏發忠賢二十四罪忠賢
益憤六月遂矯上命復議封選侍禮臣林克俞奏止之

不聽竟封李氏為康妃 十二月召還御史賈繼春徐
景濂王志道等

夏允彝曰庚申一月之內連遭大喪中外洶洶楊漣
率眾排闥見東宮即羅拜選侍時在乾清宮以母禮
自待左光斗遽疏言乾清宮非至尊不可居持論自
正但中言武氏之禍立見於今差亦過當楊左即拉
閣臣揭請即日移宮選侍頗覺皇遽御史賈繼春遂
言先帝至孝何至一妾一女不能遺庇亦未可盡言

其非然宮之應移自屬定禮楊左不可居以為功他人亦何
可訾之為罪也楊與賈互相譏諷賈以楊必將與大
璫共受封拜譏之楊遂掛冠歸中旨切責賈賈倉皇
自辨詞頗哀高弘圖張慎言出疏兩解之言至平且
確乃賈終黜為民而楊不久優擢至副院則亦東林
失平之事也後遂以此殺楊左則冤彌甚即賈亦心
憐之總之東林操論不失愛君而太苛太激使人難
受攻東林者言風顛言可灼無他意移宮太亟不失

調停卒以此罪諸賢而加以一網不大謬乎

五年夏四月給事中霍維華上言挺擊紅丸移宮三案畧曰選侍之請封也請封妃也妃之未封而况於后請之不得而况於自后不妃不后而况於垂簾臣謂宮不難移也王安等故難之也難移宮者所以重選侍之罪而張擁戴之功神祖冊立東宮稍遲諸臣羣起而爭之然篤愛震器始終不渝倘果如奸邪所稱廢立巫蠱之謀則九閭邃密乃藉一風顛之張差有是理乎非神祖

先帝慈孝無間王之案陸大受同惡相濟開覺骨月矣
神祖升遐先帝哀毀遽發夙疾而悠悠之口致疑於宮
掖宣臣子所忍言孫慎行借題紅丸誣先帝為受鳩加
從哲以弑逆鄒元標鍾羽正從而和之兩人立名非真
晚節不振委身門戶敗壞生平伏乞嚴諭纂修諸臣以
存信史已而三朝要典成起乙卯止辛酉魏忠賢矯宸
翰并之

懷宗崇禎元年五月侍講倪元璐上言主挺擊者力護

東宮爭挺擊者計安神祖主紅丸者仗義之言爭紅丸者原情之論主移宮者弭變幾先爭移宮者持平事後六者各有其是不可偏非也未幾而魏忠賢殺人則借三案羣小求富貴則借三案故凡推慈歸孝於先皇正其頌德稱功於義父批根今日則衆正之黨碑免死他年即上公之鐵券由此而觀三案者天下之共議要典者魏氏之私書以臣所見惟毀之而已假閹豎之權役史臣之筆亘古未聞當毀一未易代而有編年不直書

而加論斷當毀二矯誣先帝偽托宸篇既不可比司馬
光資治之書亦不得援宋神宗手序為例當毀三臣謂
此書不毀必有受其累者則非主三案之累而爭三案
者之累又纂修三案者之累也爭三案諸臣品原三等
如崔呈秀劉志選李春晔等不足問矣最上如黃克纘
賈繼春王業浩高弘圖劉廷宣等始處君子而不必求
同既遇小人而自能為異本末炳然然管華之席未割
老韓之傳同編數人高明之觀豈不引為坐塗之辱若

其次者雖非盡有執持要亦不皆濡染而特以史氏抑揚之過保不為後人翻駁之端至於纂修詞臣之在當日更有難言者丹鉛未下斧鑿先懸姜逢元閣筆一嘆朝聞夕逐楊世英吳士元余煌等備極調維其於忤璫諸疏有匿其全文有刪其已甚時傳書成而獄又起則有寧加醜詆之詞決不下一不道無將等字以傳會爰書凡此苦心亦多方矣而事在見聞之外未易可明若復彈章一加萬節俱喪此臣之所謂累也願勅部立將

要典鋟毀一切妖言市語如舊傳點將之謠新騰選佛
之說毋形奏牘則廓然蕩平上從之

明史紀事本末卷六十八

欽定四庫全書薈要卷八千八百八十一

明史紀事本末卷六十九

浙江提學僉事谷應泰編

平奢安

熹宗天啟元年九月四川永寧宣撫使奢崇明叛奢氏
猱種也洪武中歸附命為宣撫司世守其土數傳至
奢崇周無子奢崇明以族人得立崇明性陰鷙佯為恭
順凡有徵調罔不應命人漸狎之子奢寅有逆志負

保招納亡命時以邊事急徵四方兵崇明遂上疏請提
兵三萬赴援遣其將樊龍樊虎以兵至重慶四川巡撫
徐可求點核汰其老弱發餉餉復弗繼龍等遂鼓衆反
龍走馬舞槊直刺可求可求死遂一擁而上道臣孫好
古駱日升李繼周知府章文炳同知王世科熊嗣先推
官王三宅知縣段高選總兵黃守魁王守忠叅將萬金
王登爵等皆死之原任鞏昌同知董盡倫聞變帥衆入
城殺賊遇伏死募兵科臣明時舉臺臣李達通判王天

運俱負傷踰牆遁時土兵數千列江岸城內砲震城外
應之賊遂據重慶分兵一扼夔州水口一踞綦江遵義
一踞瀘州一截川西棧道全蜀震動 奢崇明陷遵義
時遵義道臣李仙品叅將萬金督兵援遼俱赴重慶城
中守備空虛奢崇明同其子寅帥衆奄至遵義署府通
判袁任先期委城遁賊乘勢焚劫納溪瀘州江安等城
興文永川長寧榮昌隆昌璧山皆空賊攻合州江津知
州翁登彥知縣周禮嘉悉力捍禦破走之陷興文知縣

張振德不屈率妻子赴火死 石砭宣撫司掌印女官

秦良玉勤王秦氏世為宣撫司良玉兄秦邦屏邦翰援
遼力戰死弟秦民屏重傷突圍出得歸時蘭賊厚遺秦
氏求其助良玉斬使留銀率所部精兵萬餘同弟民屏
侄秦翼明等捲甲疾趨潛度重慶營于南坪關拒賊歸
路遣兵夜襲兩河燒其船以阻賊汎舟東下自率大兵
沿江而上水陸並進又留兵一千多張旗幟護守忠州
等地方以為犄角之勢移文夔州設兵防瞿塘為上下

聲援 十月賊逼成都時瀘叙諸郡邑瓦解木枰龍泉

諸隘口俱失賊乘勢向成都指揮冉世洪雷安世瞿英
周邦太張鎧帥衆拒之邦太先至資陽遇賊不戰降冉
世洪等至九泉賊駐兵山上據高臨下衆寡不敵我兵
陷陣世洪安世英俱死之張鎧走免賊兵進薄城下懸
旌僭號四面夾攻城內僅有鎮遠營七百人調到松潘
茂州龍安兵一千五百餘人御史薛敷政左布政使朱
燮元登陴而守初燮元方以輯瑞就道蜀王出國門與

百姓遮留之。變元慷慨自誓，賊薄城。變元使土司坤汝常乘賊指揮，常恭等火砲助之。賊稍卻，斬賊先鋒一人。次日，賊數千人障革裹竹牌進，矢石不得近。變元命架七星砲、火箭、火磚衝擊之，殺數百人。至暮，賊擁鉤梯數千攀城，欲上。變元戒士卒第放砲，礮石亡譁。遲明，賊積屍陵城下。時冬濠水涸，賊帥降。民持箴束薪載濠土，壘如山上，架蓬葦形，類行屋以避銃石。伏弩仰射城中，垂簾蔽矢石。變元夜縫壯士持芻塗膏殺守者，縱火火舉。

山隕賊大阻變元又遣人決都江堰水至濠濠滿賊乃
治橋得少息因緝獲城中與賊通者二百人懸其首陣上
賊又于城四面立望樓高與城等變元曰賊設瞭望必
四出剽掠其中虛遂命死士五百人突出擊之賊果無
備斬其三將燒樓而還當是時諸道援兵相繼至十二
月二十四日復安岳縣二十八日復樂至縣與賊戰於
倒流鎮石橋永清舖俱有斬獲各路兵或轉戰得至城
下或潰敗去秦良玉兵三千亦至然賊兵亦日益增無

退意賊圍城八十餘日歲且盡城中人伏臘不祭王正
不賀賊城外日發諸人塚墓城上望見皆泣會有俘民
脫歸者言賊旦夕須早船一決勝負

二年春正月賊數千自林中大噪而出視之有物如舟
高丈許長五百尺樓數重簾幕左右板如平地一人披
髮仗劍上載羽旂中數百人各挾機弩毒矢牛數百頭
運石轂行旁翼兩雲樓如左右廣俯視城中老幼婦女
皆哭燮元曰此吕公車也破之非駁石不可駁石者巨

木為杆柱置軸柱間轉索運杆千鈞之石飛擊如彈丸
賊舟不得近變元復募敢死士以大砲擊牛中其當軛
者牛駭返走乘勢縱擊敗之然城中亦力竭矣裨將劉
養鯤言有諸生范祖文鄒蔚陷賊中遣孔之譚來約賊
將羅乾象欲自拔効用變元即遣之譚復往至則與乾
象俱來變元方臥戍樓呼與飲乾象衷甲佩刀變元不
之疑就榻呼同臥酣寢達旦乾象感激誓以死報許之
繼而出後賊營舉動纖悉無不知者乾象之力也踰數

日又使牙將周斯盛詐降誘其來設伏待之崇明果自
至甫懸一人上松潘守兵不知大噪崇明走伏起獲其
從騎數人崇明跳身免乃謀遠遁變元偵知造木牌數
百面投錦江順流而下令有司沉舟斬筏斷橋梁嚴兵
以待賊夜半果逸乾象等內變賊營四面火起崇明父
子拔營走乾象等皆來歸成都圍凡百有二日而解賊
渡瀘歸重慶事聞以變元為巡撫三月羅乾象復江
安四月官兵復新都初奢賊據新都繕城積粟為守計

因克安岳攻保寧聲言直取潼關人心震動安綿副使
劉芬謙湖廣監軍楊述程合兵攻之兵至牛頭鎮賊以
騎數千步萬人來援秦良玉譚大孝等夾擊敗之遂復
新都賊退入蘭州復遵義府時有湄潭叛民王倫引賊
焚掠湄潭為川貴險要都司陳一龍追至水西境降之
諸軍進駐遵義時惟重慶尚為賊巢五月諸軍進逼重
慶初奢崇明父子據瀘汭倚樊龍為聲援龍盤踞重慶
已九閱月重慶古渝州地也三面臨江春水泛漲一望

瀰漫不可渡其出入必經之要道惟佛圖關至二郎關
一路賊自通遠門城濠至二郎關連營十有七宿精兵
數萬監軍副使丘志充楊述程總兵杜文煥帥兵進攻
之再戰幾入其壘翌日文煥帥叅將楊克順等直抵賊
營石砦宣撫官秦民屏率部兵遶出其後賊驚敗遂連
復佛圖二郎關殺賊三千餘人積屍深溝兩岸俱平
乘勝進逼重慶二十七日以計擒賊首樊龍張彤何若
海等十一人遂克之 六月川師復瀘州 七月遵義

復陷 貴州水西土目安邦彥叛邦彥安堯臣別枝也
安堯臣冒隴姓并隴地受撫得襲兄彊臣世職堯臣死
妻奢社輝子安位幼邦彥挾之反時四十八馬頭與頭
目安邦俊魯連安若山陳其愚陳萬典等遙起和之都
司楊明廷以三千人敗沒於畢節叅將尹啟易等自烏撒
奔回霑益炎方松林皆不守平彝衛亦為賊黨李賢所
破賊圍普安安南雲南都司李天常帥兵四千救之賊
將羅應奎偽降誘至疊水鋪伏發全軍皆沒於是交水

曲靖武定尋甸嵩明之間騷然苦兵矣賊分遣王倫石
勝俸下甕安襲偏橋以斷我軍倫等楊應龍餘孽也洪
邊土司宋萬化糾苗仲九股據龍里邦彥自統蜀賊苗
仲數萬進圍貴州自二月初九日薄城下造雲梯製滾
廟築墩臺百計攻城撫臣李穰按臣史永安悉力御之
賊沿山紮營四面伏路把截以斷城中出入盡掘環城墳
墓殺掠甚慘置木柵壘戶墻烏雀不能飛渡鎮將張彥
芳將兵二萬赴援隔龍里不得進 貴州總兵楊愈懋

推官郭象儀與賊戰於江門白杵營死之 安邦彥破
烏撒衛指揮管良相死之先是水西未叛良相語李樞
曰奢氏反安必繼之黔中無兵餉猝然有變計將安出
宜招兵萬人積二年穀用許成名將之以觀其變樞以
力不能止後良相以祖母病乞假去泣而曰烏撒孤城
且與安效良相仇水西有難禍必首及良相隻身無子
願以死報國乞圖長策保此一方樞亦泣良相去甫一
月而難起烏撒首被賊破良相自縊死 巡按都御史

王三善進兵平越時平越所陳兵止萬餘人副總兵徐時逢叅將范仲仁不相能仲仁先進遇賊於瓮城河戰不利時逢擁兵不救遂大敗諸將馬一龍白自強等殲焉各處聲援俱絕貴陽圍益困城東隅有山岡與城齊賊踞其上作廂樓官兵設計燒之火三晝夜不絕城中糧久乏將士病不能戰巡按史永安上疏詆王三善大聲疾呼十一月三善大會將士議曰省城不能待矣外援不至吾輩死法死敵等死耳尚何俟耶命道臣何天

麟督兵七千從清水江進為右部道臣楊世賞督兵萬人從都勻進為左部三善自將二萬與道臣向日升從中路進當賊鋒十二月抵新添啣枚疾走二日進母猪洞三日次新安是夜賊報至營中驚擾議退兵三善曰退即齏粉以死捍之按兵不動卒無賊四日命劉超為前部抵龍頭營三善以身尾之相去不二里聞銃聲衆股栗欲止三善曰前驅當賊必無退者吾當為後勁遂策馬而前未一里劉超捷音至超兵遇先却超下馬斬

二人持刀斷賊一標賊首阿成驍勇善戰超與部兵張良俊直前斬其首賊遂披靡適大兵至大呼齊進奪龍里賊衆復大集大戰却之五日住龍里城衆議去省會不遠賊必重兵堵截宜少休息三善曰我兵猝至賊無備不能持久急擊之勿失六日遂策馬先進衆隨之賊覘者亦知新撫自將意有數十萬兵至相顧駭愕安邦彥給其衆曰吾當增兵來助遂遁去賊相率退屯龍洞我師奪高寨七里冲乘勝進兵畢節舖賊步騎如雲孫

元謨將所製木發貢七門齊發賊死無算楊明楷率烏
羅兵如墻而進賊大敗其渠安邦俊被銃死棄輜重器
械山積遂乘勝抵會城撫臣李橧按臣史永安學臣劉
玄錫死守者幾十月旦夕城且陷忽見賊兵奔潰如蟻
喊聲雷震俄頃五騎衝鋒至城下云新撫至矣軍民大
悅慶更生是時三善同將卒披氊單騎冒矢石以二萬
人破賊十萬橧等迎入城三善曰賊兵不遠軍心未定
我大帥也不可即安遂營於南門外坡上大雪次日移

營宅溪賊聞遠遁陸廣河外三善遣使諭奢社輝母子
縛安邦彥降不報越數日左右兩部兵至又十日而楚
粵蜀之兵亦至三善怒其後期且憂乏食欲謝遣之將
校皆曰數千里赴援不可却也三善念衆多倉儲空虛
欲因糧於敵又諸軍視賊過易十二月三十日前鋒楊
明楷率兵渡河札營三十里外一軍屯陸廣向大方奢
社輝一屯鴨池向安邦彥巢穴

三年春正月賊復糾藺賊與雲南安効良等帥衆數萬

并力攻陸廣楊明楷奮勇接戰蒙兵先潰衆遂亂溺水死者數千明楷陷賊中賊乘勝赴鴨池我兵退屯威清三善收兵入城土司苗仲見我軍不利復肆刼掠自龍里至瓮城屍橫四十餘里夏四月川師復遵義時賊首尤朝柄楊維新鄭應顯據遵義副將秦衍祚侯良柱督兵二千攻之誘戰於九接灘以銳斃其渠揀賽復追敗賊於南城外羅鋼渡遂克之賊安鑾帥妻子部衆降安鑾為奢寅右臂監軍道趙邦清密遣賊黨了相

喻文富招之鑾心動顧以妾石氏子安在嵩在符國

楨營未敢發十四日官兵抵羅付大河口擊奢寅敗之

鑾見寅敗乃密約副總兵侯良柱助兵挾取妻子良

柱分遣羅安良進陶公灘以牽賊自帥親兵七百人

同鑾部兵夜經三寨抵賊巢銃砲震天賊倉卒不知

我兵多少符國楨先走鑾率妻子及部兵數千自拔

來歸川師復永寧先是川撫朱燮元會衆議曰我

之久不得志於賊者我以分賊以合也於是列營納

谿陽為進取而陰令大兵會長寧首攻麻唐坎觀音庵
青山崖天蓬洞等處乘霧奪險而入與石砭兵會進攻
永寧遇賊於土地坎奢寅親率兵搏戰我兵奮勇擊敗
之追至老君營涼傘鋪盡燒賊營寅身被二鎗樊虎亦
創死復敗賊於橫山八甲青崗坪等處直抵城下一鼓
拔之生擒周邦泰等降賊二萬踰城溺水死者無計奢
崇明父子列營江岸上官兵隔水而壘降者日至賊復
遁安邦彥知我兵潰扇誘苗仲糾合逆黨宋萬化等

復欲犯貴州使其黨何中尉據龍里李阿二督四十八

莊兵圍青巖斷我糧道宋萬化督洪邊兵苗仲為左翼

吳楚漢結八姑蕩平八莊苗仲為右翼自統水西兵約

共犯會城王三善遣遊擊祁繼祖統盧吉兆左世選兵

下龍里一鼓破蓮花堡連燒上中下三牌賊寨百五十

處何中尉敗逃深箐龍里路通遣叅將王建中劉志敏

宋廸屈朝先等救青巖斬首三百餘級王元佐等兵繼

進焚賊寨四十八莊李阿二中神鎗逃歸水西定番路

通謀報賊方糾八姑蕩洪邊二路兵進犯會城三善夜遣
王建中祁繼祖等兵一萬五千進勦八姑蕩焚庄寨二百餘
處斬首五百級窮追渡河溺死者無算焚其積聚數萬
賊糧絕謀遂寢宋萬化遣人詐降覘動靜三善佯許之
而調監軍楊世賞督劉志敏祁繼祖等捲甲赴之賊倉
皇出戰遂被擒并其妻子及偽軍師劉洪祖等萬化驍
勇善戰邦彥倚之至是奪氣四路既通秦民屏兵至平
越復還守龍里諸苗叛者相繼降三善給黃旗使各豎

寨中邦彥望見之不敢復出但於鴨池陸廣諸要路掘坑塹修補水西屯兵為自守計五月川兵發永寧進追奢崇明連克紅崖天台二寨賊數千人迎降遂安撫紅療四十八砦時總兵盧世卿擒偽御史汪澤遠偽叅謀文道南副將秦翼明擒偽監軍夏奇雲偽給事中孔聞過等并偽印十餘鎧仗如山又獲安兵田進忠云奢賊計窮將美女黃金降水西借兵安邦彥遣兵十六七營已過河到獅子山目把曾仲英領兵六營尚駐赤水

河謀分兵一由鎮雄兵三營乘永寧之後一由普安入
新寨攻永寧之前十三日羅乾象督兵破蘭州焚其九
鳳樓掃其巢奢賊狼狽走 雲南六佐縣營長安應龍

合霑益賊首補鮓為亂圍羅平巡撫閔洪學攻羅平克
之移兵覆其巢俘其妻子應龍逃普安復入烏撒已安
効良乞降責其縛補鮓應龍以誘之効良縛應龍以獻
水西蘭賊合兵窺遵永時蘭賊奢崇明奢寅戰屢敗
窮蹙投水西安邦彥復助兵合謀一窺遵義一窺永寧

官兵合長納兩路敗之於芝麻塘賊遁入青山 六月

貴州總兵魯欽等三路進兵直入賊巢擒土司何中尉等進營紅崖紅崖者天台水脚婁石牛酸草等七囤素稱天險官兵未有至者總兵張彥芳擊賊於羊耳亦敗之追至鴨池河奪其戰象斬首二百七十餘七月大兵戰勝深入大堤洪紅烏岡賊所僭烏芸等部苗望風奔潰三善按轡直入大方降者千計救出田景猷劉志敏楊明楷等奢社輝安位焚大方老巢竄火灼堡安邦彥

逃入織金

川兵入龍場陣獲奢崇明妻安氏及奢崇

輝蔡金貴李廷王承恩張尚極等

安位母子遣漢把

劉光祚赴鎮遠乞降總督楊述中許之授賊黨袁紹等

狀令擒奢寅父子自贖遣之回巢紹等至省羈留未發而

撫按會議亦勒限安位母子縛解安邦彥奢寅然後請

旨治罪大抵三善以元凶未窮當用勦為撫而述中一

意主撫議遂不合三善駐大方日久邦彥日夜聚兵自

益令其黨陳其愚詐降其愚者目把中大猾也三善輕

信之多與叅贊軍務由是邦彥纖悉盡知

四年春正月王三善自大方還貴州陳其愚相繼隨行
忽傳其愚山後遇賊三善勒馬回視其愚故縱轡衝三
善墮地三善知有變將帥印付家人囑令護持先去即
抽襪中小刀自刎頸皮已破其愚下馬奪其刀擲鬼諸
苗蜂擁而至三善罵賊不屈賊割其首去副將秦民屏
亦死之秦佐明祚明突圍出賊勢復張事聞總督楊述
中回籍聽勘既而監軍御史傅宗龍獲陳其愚誅之其

愚狡凶多計數邦彥倚為耳目至是伏誅 秋七月總
理魯欽劉超克巖頭寨破平茶乘勝深入至織金敗績
五年春雲南巡撫閔洪學復霑益水西蘭烏霑三逆合
兵數萬窺霑益敗走之四川烏撒土目安効良水西賊
安邦彥肺腑之親也其順逆惟水西是視水蘭相繼叛
滇撫閔洪學以兵力不繼羈縻之令其擒賊自贖効良
亦佯為恭順擒安應龍以獻而所遺獻功之人領文還
中途被劫効良又見黔師出陸廣滇師入霑益隱然有

撫背扼吭之勢水烏益成騎虎矣至是遂乘截黔之餘
焰南向入滇合蘭水烏雷安南諸部三十九營直抵雷
益衆十倍於我副總兵袁善宣撫使沙源等督率將士
奮勇血戰對壘城下者五日夜屢出奇兵破走之

六年春水西苗老虎阿引等殺賊酋奢寅來降苗老虎
隨侍奢寅有年着巴乃寅騎引馬卒李老松乃寅看茶卒
與寅同居聶舌坝上寅妻在箐林山上相去二三里奢
崇明居克仲坝相距三百餘里寅子阿甫年七歲一女

嫁芒部時水西約二月三路興兵一攻雲南一攻遵義
奢寅專攻永寧寅素性凶淫附近彝人妻女有姿色者
強奸之富於財者勒索其鏹不遂輒死以此部下多往
鎮雄芒部逃生其麾下人阿引等故嘗受撫臣朱燮元
金錢令圖寅與總兵李維新歃血密謀舉事寅微覺縛
阿引拷掠之以利刃穿其左足一晝夜阿引至死不承
乃釋之阿引因勾合苗老虎李明山等同謀適奢寅與
其下痛飲酣歌登床而寢老虎佯與寅蓋絮見寅睡方

軒持刀砍其胸寅大呼李明山復助砍身死腸出明山
刀折偽總兵等闌入苗老虎走直往箐中擒寅妻妻已
聞變逃矣賊黨追苗老虎等甚急至一碗水過官兵乃
降 二月安邦彥率衆數萬渡江與我兵大戰數日總
理魯欽力禦之抵暮賊兵益衆而我兵因數月無餉乘
夜皆潰魯欽自刎死賊燒劫麻姑孫官堡苗仲復助逆
貴州三十里之外樵蘇不行城中大震巡撫王城巡按
傅宗龍先遣王國禎等攻河沙壩羅鬼盡俘之廣順定

番青巖白納一帶苗蠻為之奪氣繼遣張雲鵬逆邦彥
於趙官堡小戰二日大戰二日所殺傷者甚衆水內水
外之賊奔走潰歸道路復通 總督朱燾元以父喪歸
加偏沅巡撫閔夢得總督從中調度控制五省 夏黔
兵攻勻哈長田一帶諸苗黔中四面苗仲而最狡悍者
無如勻哈安邦彥初叛圍龍里新添皆藉其衆至是數
出沒劫掠清平新添地方餉道為梗平越知府會同都
司張雲鵬率兵攻擺沙大寨擺沙居寨之中距平越百

餘里乘夜由間道掩襲破之賊遁入箐其中米積如山
次日搜百里大山移營牛場箐保文鸞攻獲岳等寨復
攻都勻城西南仲賊八路會兵入箐各有斬獲復攻江
時戶西高平養古數十寨斬首二千餘級掃蕩二百餘
里

七年秦叅將楊明輝奉命宣諭安位令擒獻首惡為安
邦彥所殺

懷宗崇禎元年秋七月詔起朱變元仍總督貴湖雲川

廣五省軍務

二年夏六月初大方東倚播北倚蘭相為犄角後播蘭既平賊惟恃烏撒為援而畢節為四裔交通處先是王三善由貴陽陸廣入大方陸廣至大方百七十里皆羅鬼巢窟前可衝我後可包我左右可衝擊我三善卒以失地利陷天啟間變元建議滇兵出霑益過安効良應援而別布天生橋尋甸等以絕其走蜀兵臨畢節扼其交通四裔之路而別出龍場巖後以奪其險黔兵由普

定渡思臘河徑趨彥巢而陸廣鴨池擣其虛粵西出泗
城分兵策應然後帥大軍由遵義鼓行而前尋以憂去
未及用總督閔夢得繼之亦以貴州抵大方路險而賊
惟恃畢節一路外通用兵宜從永寧始自永寧而普市
而摩泥而赤水百五十里皆坦途赤水有城郭可憑而
守宜結營於此漸進漸逼四十里為白巖六十里為層
臺又六十里為畢節畢節至大方不及六十里賊必併
力來禦須以重兵扼之斷其四走之路然後遵義貴陽

尅期並進亦不果用至是變元再涖黔乃檄滇兵下烏撒蜀兵出永寧畢節扼各路要害而親帥大軍駐陸廣逼大方 八月奢崇明號大梁王安邦彥號四裔大長老歹費小阿烏繼阿鮓怯等各號元帥悉力趨永寧先犯赤水謀知之變元授意守將許成名佯北誘賊深入度賊已抵永寧分遣林兆鼎從三岔入王國禎從陸廣入劉養鯤從遵義入邦彥分兵四應力不支羅乾象復以奇兵繞出其背急擊之賊大驚潰崇明邦彥等皆被

創漢兵斬其首獻變元不欲窮兵乃移檄安位赦其罪
許其歸附而位暨子不能自決其羣下復謀合潰兵拒
我變元乃大會諸將曰水西多山險叢箐篁簞煙棘雨
莫辨晝夜深入難出以此多敗當與諸君扼其要害四
面迭攻漸次蕩除使賊乏糧將自斃於是焚蒙翳剔巖
穴截溪流發勁卒馳騁百餘里或斬樵牧或焚積聚暮
還歸屯賊益不能測凡百餘日所得首功萬餘級生口
數萬每得嚮道輒發窖粟就食而賊饑甚劉養鯤遣其

客入大方燒其宮室懸榜而出安位大恐乞降與約四
事一貶爵一削水外六目之地歸朝廷一獻殺王巡撫
者首一開畢節等驛路安位皆受命遂率土目納款變
元為奏請詔許之乃條陳便宜九事不設郡縣置軍衛
不易其俗土漢相安便一地益墾闢聚落日煩經界既
正土目不得以民不耕地漸侵軼便二黔地瘠仰給於
外今自食其土省轉輸之勞便三國用方匱出太府金
幣勞諸將不足以爵酬之爵輕不若以地於國無損便

四既許世其土各自立家經久遠永為折衝便五大小
相維輕重相制無事易以安有事易以定便六訓農治
兵耀武河上使賊日備我便七從兵民便願耕者給之
且耕且戍衛所自實無勾軍之累便八軍耕抵餉民耕
輸糧以屯課耕不拘其籍以耕聚人不世其伍各樂其
業便九上可其奏

九年朱燮元遣兵誅擺金雨江巴香狼壩火烘五洞叛
苗悉平之水西勢益孤又通上下六衛并清平偏鎮四

衛道路凡一千六百餘里設亭障置游徼以便往來滇
中沐氏土舍普名聲亂變元奉命移兵討平之名聲伏
誅

十年水西安位死無嗣族屬爭立朝議欲乘其弊郡縣
之變元上書諫乃止變元遂傳檄土目諭以威德諸部
爭納土獻重器變元召將吏議以為衆建土司使其勢
少力分則易制各欲保土地傳子孫則不敢為逆乃上
奏曰臣按西南之境皆荒服也楊氏反播奢氏反蘭安

氏反水西而滇之定番彈丸小州為長官司者十有七
二三百年来聞有反者非他司好逆而定番忠順也蓋
地大者跋扈之資而勢弱者保世之策也今臣分水西
之壤授諸渠長及有功漢人咸俾世守凡其俗虐政苛斂
一切除之使叅用漢法可為長久計制曰可西南遂底
定焉

谷應泰曰天啟中奢崇明以猺獍種據重慶安邦
彥以水西酋反貴州蓋苗俗叛服不常乃其天性


而兩家者又倚為唇齒時通姻婭所謂同功一體之人也乃謀亂之初則奢先而安繼窮追之日則奢敗而安亡覆轍相尋合若符契小醜墜宗於人何尤焉以予觀奢崇明陰鷙有謀其子寅招納亡命一舉而全蜀震動剽銳莫當宜非邦彥所敢望也然而邦彥之師尚堪持久而崇明之衆旋即挫衄又往往降於水西投於安部者則以安之地大而力盛也奢首竊發止蜀道一隅而安酋轉戰西

通巴夔南壓滇黔又合烏雷安南諸部落綿亘長
驅動搖數省此之不戢真江楚之深憂也以故恢
蕩之功亦以平安為首平奢次之平奢者秦良玉
之夜襲兩河杜文煥之佛圖奪壘盧元卿之紅崖
積仗其功不可泯也平安者王三善之奮斬十萬
秦衍祚侯良柱之夜拔三寨張雲鵬之八路進兵
許成名之三方深入其功更不可泯也乃崇明邦彥
同時陣殲奢寅淫縱內自相圖既平五洞叛徭又

開清平四衛新設亭障增置游徼者凡一千六百
餘里雖漢之樓船十道西通再駝其盛不能及也
然其時發蹤指示出奇無窮多出於督臣朱燾元
之方畧論者以固守成都蕩滅羣妖招降安位為
燾元功不世出而不知善後撫綏分裂其地使南
人不復反者皆燾元之長算也善乎燾元之疏曰
今分水西之壤授諸渠長及有功漢臣咸俾世守
蓋地大者跋扈之資而勢弱者保世之策也昔王

父偃令宗室得分王子弟而藩服益削則知衆建
土司而少其力者其真馭遠之良規歟

明史紀事本末卷六十九



總校官庶吉士臣張能照

校對官編修臣楊壽楠

謄錄監生臣喻泰階